




1736



敬業堂詩集

一四


Inches 1 2 3 4 5 6 7 8



Centimetres 1 2 3 4 5 6 7 8 9 10 11 12 13 14 15 16 17 18 19

Blue Cyan Green Yellow Red Magenta White 3/Color Black

**TIFFEN** Color Control Patches

© The Tiffen Company, 2007





敬業堂詩集卷四十五目錄

吾過集

楊致軒偕諸子枉過敝廬

蠓奴歌

并序

畚施自勗

八月晦日榆村季方曾三芝田諸兄弟偕過桂堂

小飲次芝田韻

第六孫生

聞德尹患風疾將上章乞休寄懷二首


重陽後一日季方兄招同諸兄弟龍尾登高

題龍尾山僧舍

朱乾若輓詩二章

衍齋惠香椽戲答二絕句

偶過雨梧齋看菊別後得二十韻寄主人楊致軒



訪陳侍御梅溪郊外新居二首

座主宗伯許公再邀楊晚研陳宋齋梅溪及余為

五老之會席上分賦二章時立冬後四日

牆根冬菊

禾稼初收野眺作

題杜集後二首

讀莊子內篇八首

十一月初七夜紀事

庭卉具萎手除枯莖

兒建歸櫬權厝西阡

閱邸報北直學使交替有

人知德尹歸期不遠矣作詩志喜四首

蠟梅宋以前未有賦者東坡山谷后山少游始見

於吟詠率皆古體而不入律王平甫陸務觀尤

延之楊誠齋各有五七言律詩方虛谷瀛奎律

髓選附梅花類中雪窗披覽頗不愜意適友人  
折贈此花信手拈筆非敢與前賢較工拙也

過德尹城中新居十二韻

雪後次東坡韻二首 丙申二月雨雪連絲援筆

排悶

積翠樓古栢恭次座主宗

伯公原韻二章

盆中鴛鴦梅戲次許東垞

韻

蚍蜉

二月杪偕諸兄弟西阡看梅集句

又一首

三月三日塘西卓氏園看

梅

雨後玉蘭未殘適德尹自

武原歸再飲其下此樹弟手植者

馬衍齋筮易得漸二爻既以名其居復繪小影坐  
磐石旁竹垞老人舊書于磐二字今以圖來索  
題附綴數語義盡於卦無取旁求也

三年前手植牡丹閏月始花吟成八韻  
大雨枕上作  
閏三月十一日拙宜園杜

丹之期時晚研將赴密雲城工兼以送別四首

腰痛自嘲

苦雨歎

海塘歎

蠶麥歎

復愁四章

敬業堂詩集卷四十五目錄 終

敬業堂詩集卷四十五

海寧 查慎行 悔餘

吾過集

起乙未八月  
盡丙申四月

自聞建兒之訃三月無詩中秋後三日楊致軒太  
守偕令叔東崖施子自勗過慰流連信宿聊資觴  
咏排遣哀情夫喪明之戚賢者以為規吾何人斯  
敢不知過乎

楊致軒偕諸子枉過敝廬

老抱延陵痛經秋只自悲感君攜伴至慰我歛眉時久  
別可無酒有情聊賦詩勿嫌芳草月今夜過牆遲

蠅奴歌 并序

海中有小蟹寄居螺殼中兩螯四跪外向能行按  
本草蟹大如錢居蚌腹者蠣奴也昌黎云入者主  
之出者奴之今乃以入者為奴耶戲作歌索諸子

和

介蟲三百有六十蟹族爬沙乃其一旁加八跪撐雙螯  
帶甲橫行風雨疾無端幻作腹居蟲竊食蠣肉專其宮  
吾聞出者為奴入者主主今安在奴稱雄吁嗟乎大魚  
噉多鰕鮒泣觸蠻蝸角爭方急鵲巢古亦有鳩居燕室  
終須防雀入

畲施自勗

才子生同邑陳人喜得朋每蒙詩見及祇覺愧難勝薄

俗餘孤賞虛懷去一矜好傳橫浦集彥質有雲仍

宋施德操

字彥執吾邑人也與張子韶友善橫浦集中與彥執尺牘及唱酬詩甚多自勗豈其苗裔乎

八月晦日榆村季方曾三芝田諸兄弟偕過桂

堂小飲次芝田韻

夢裏悲歡覺者誰流光去我杳難追重尋老圃看花約

已失中秋坐月期委蛻子孫聊自解時榆村兄有在原

兄弟詎勝思余時適聞德尹病風辭免之信達觀至竟談何易除却銜

杯百不宜

第六孫生

東吳方喪子次息又添孫歌哭於斯室興衰視此門家  
貧寧計口客至且浮尊敢料成童日吾猶月告存

閒德尹患風疾將上章乞休寄懷二首

道遠傳書少年侵感事多忽聞君末疾轉益我沉痾家  
運衰如此朝恩重若何勿將身試藥時世少醫和

食新吾自幸屈指又三年偕隱原初約當歸那問天婢  
牽蘿補屋奴縛草為船慙愧分甘意寬心及目前大兒身後

多官通弟許分結  
茅之資以慰余懷

重陽後一日季方兄招同諸兄弟龍尾登高

只船昨夢隔漁洋枕林相攜又故鄉海蜃浮空呈寶刹  
石龍渡水得殘岡嘉禾野潤初收雨綠樹村濃未剪霜  
愛惜眼光留足力年年來此作重陽

題龍尾山僧舍

龍形蜿蜒三四里起伏雕尻露顛趾秦鞭怒爾屹不移

鑿斷其腰曳其尾

龍腰俗傳秦  
始皇所鑿

何年一掉鱗甲摧蛻骨

化石凝堅胚山僧負土補石縫長養松竹從嬰孩駢青

聳翠皈佛力鎮以精藍高岌岌鼉鳴鯨吼海外聞樵唱

漁謳月中入回首茫茫禹九州茲山奚啻一浮漚蘭單

合是疲牛路老矣猶能賦近遊

東廣微近遊賦  
駕蘭單之疲牛

朱乾若輓詩二章

名高無顯晦業富有淵源家自傳閩學身嘗到孔門兄

出紫陽曾設教荒榛誰與闢碩果幸猶存豈意龍蛇厄

於衍聖公家頻傷好弟昆

與三子懷兩兄十年  
來先後俱下世故云

白頭歸已晚索莫感離羣昨歲猶過我今朝又哭君恍

疑神理接不謂死生分孰是辭無愧來題有道墳

衍齋惠香櫟戲答二絕句

磊落筠籠五十枚清香分供佛前來敢同賣菜還求益  
待覓根株自接栽

也擬堦前種一枝老人作計太迂遲心知證果非難事  
眼見開花是幾時

偶過雨梧齋看菊別後得二十韻寄主人楊致

軒

貧家無菊看一棹訪城隈且喜經霜在非關冒雨來秋  
光如我待病眼爲渠開百本紛成列千頭疊作堆枝枝  
疑竝蒂朵朵儼重臺倚賴扶身竹因依帶土苔淺深微

別色高下悉呈材涼蝶窺簾度慵蜂拂檻回差堪登瓦  
岳直可勸金壘花及兼旬賞根須隔歲培相逢雖解后  
臨別尚徘徊預作東籬計分苗手自栽

訪陳侍御梅溪郊外新居二首

見說新居好幽尋不待招年豐禾被坂潦退水平橋改  
路侵桑柘爲鄰傍緯蕭涼風吹白蛤來問郭西樵

海氣孤村外秋聲万木間名方高洛社夢不點朝班閱  
世隨流水安身比太山傲他軒冕貴投老遂長閒

座主宗伯許公再邀楊晚研陳宋齋梅溪及余  
爲五老之會席上分賦二章時立冬後四日

又作名園三日留欸門人各有扁舟宵能縱酒晨還醉

晴便登山雨即休且喜大家添一歲未應高興減前遊  
黃花已老丹楓嫩斟酌初冬勝晚秋

勿論雪北與香南谷水東西亦有庵行處人言星聚五

序來吾忝齒居三緇黃世外關存没是遠上人仍入坐  
南山張道士已下

世風月尊前助笑談錯料詩成如噉蔗後來居上得無

慙晚研梅溪兩家令于俱  
從遊詩又先成故戲云

牆根冬菊

直自陳芟發何煩客土移近根除蝨葉藉草出卑枝點  
綴荒蕪徑支撐缺壞籬栽培初少力敢怨作花遲

禾稼初收野眺作

窮鄉十年九旱潦嘉種歉歉蕃庶草秋來雨幸不成災

安慰人情眼前好溪南祀稷百頃田縱橫蚱蜢飛連天  
黃雲捲盡霜野濶放眼直到南山邊新春家家催相杵  
倚杖閒聽鄰叟語偶然村社飽雞豚久矣官倉肥雀鼠

題杜集後二首

此老原非諫爭姿許身稷契復奚疑可憐官馬還官後  
徒步歸猶號拾遺

漂泊西南且未還幾曾蒿目委時艱三重茅底林林漏  
突兀胸中屋萬間

讀莊子內篇八首

世人耳目隘直與蜩鳩鄰焉知天地間乃有鵬與鯤小  
窺大不盡大視小不倫吾遊非彼適彼笑非吾聞

彼此一是非有一斯有万於中強分別間不能以寸齊  
之以不齊兩俱置勿問方將與物化何有乎物論  
其意在詆儒其說乃近仙其源發乎老其漸流爲禪養  
生徒養形木寇膏自煎是形無不盡薪盡而火傳  
死生非二理出入同一機人皆有故鄉弱喪昏不知千  
載旦暮遇淵明悟其微南山舊宅在逆旅終當歸  
生本玩世人初未忘用世觀其審出處亦重君臣義用  
世必以言忠言或取戾所以遭天刑寧甘爲世棄  
人人兩其足恥與兀者徒向非德內克有足不啻無外  
形而形全內神而神腴形神兩皆寓是謂內外符  
讀書自得師深淺隨所到當其快領會何異朝聞道勞

生佚以老反覆覺語妙妙處老方知毋輕示年少  
者欲必有開聰明出乎鑿自從渾沌死天下無純樸帝  
王遞相嬪泰氏不可作世運日趨澆滔滔緊誰覺

十一月初七夜紀事

未年建子月村舍宵喧逐老夫衣服冠起坐中心摧女  
媧石破碎猛雨噴空來風勢助靚靚電光走焯焯孤陽  
五陰下七鬯吁可哀復其見天心奮地乃出雷我欲祝  
雷公馳聲徧九垓毋徒震百里號驚童孩又欲禱風  
伯非時掃氛霾明兩日重光天門誅蕩開五行有常變  
數以反覆推孰者主張是瑞或生於灾世運視斡旋人  
情仰昭回露生亦何事蟄戶行復培

庭卉具萎手除枯莖

條蔓天生弱况兼冰霰加過時多悴物經眼即空華芒  
刺除三逕蒸薪共一車但看枯穢盡何種不萌芽

兒建歸櫬權厝西阡

自得淮南信輻歸報有期遠慙羸博葬近慰首丘思魂  
魄孫隨祖冰霜父哭兒一號臯某復望絕倚門時

閱邸報北直學使交替有人知德尹歸期不遠  
矣作詩志喜四首

冬來日日望廻輪邸報遙傳信漸真客病也應資藥餌  
長途未可恃精神官隨年限纔經臘弟於去冬赴任農  
及是僅滿一年告歸期正及春勞動里中羊酒賀一家遂有兩間人王介

甫詩有豈容家有  
兩間人之句故云

舊莊喬木蔭茅茨六十餘年黍一炊卅角光陰雙鬢改  
釣遊踪跡兩心知交頭對倚花前杖斂手閒看劫外棋  
見說漢廷偏愛老申公免病故遲遲

盛事依稀記玉堂後先出入總恩光魚潛樂莫如同

隊雁序歸仍不亂行忍便析居違丙舍尚煩刻碣表瀧  
岡經耨績火原家法相戒兒孫勿去鄉

長虞晚節相從少豈料歸期不約同弟今年六十四與  
余引疾之歲恰同

架有圖書延客座堂無絲竹變鄉風桑榆賸飽溫暉味  
梨棗粗收長養功校勝蘓家好兄弟對牀來作白頭翁

蠟梅宋以前未有賦者東坡山谷后山少游始

見於吟詠率皆古體而不入律王平甫陸務觀  
尤延之楊誠齋各有五七言律詩方虛谷瀛奎  
律隨選附梅花類中雪窗披覽頗不愜意適友  
人折贈此花信手拈筆非敢與前賢較工拙也  
閱盡嘉平臘來為最晚芳心含淺紫雪瓣吐嬌黃後  
菊偏同色先梅別有香百花多釀蜜容爾占蜂房

過德尹城中新居十二韻

再得歸田一紙書喜於身自挂冠初城隅別儼三間屋  
戶外高懸四望車飽閱官情知進退好還天道任盈虛  
豈惟太息傳供帳頗覺謹聲動里閭應接稍防生客擾  
往來寧慮舊交疎囊衣事偶同王吉襜被人應諒魏舒

世上名皆身以外曆頭冬是歲之餘巢成古樹寒依鵲  
檻俯清池夕數魚膝下諸雛看漸長燈前二老笑相於  
小時至性君猶在病起精神我不如良夜且為無事飲  
明年仍擬故林居園廬早晚梅花發已遣家童預掃除

雪後次東坡韻二首

繞屋聞聲已散鴉到門無逕可停車雲端海日峰峰玉  
畫裏山村樹樹花酒上衰顏聊遣興詩經白戰自成家  
梁園賦客爭工拙未抵先生手一義

亦知天色朝來好不奈風威分外嚴笑指屨屨供爨蠟  
戲搏師虎作形鹽晴綿朱拆猶鋪逕冰筍俄長欲墮檐  
最是窰盆先得氣蘭芽已放兩三尖

丙申二月雨雪連縣援筆排悶

巡檐倚杖步蹒跚  
村巷泥深欲出難  
二月風光三日雪  
閏年天氣半春寒  
蟻浮竹葉杯常凍  
雀啣苔枝蕊未殘  
好笑織兒羣擲瓦  
不聞古井復生瀾

積翠樓古栢恭次座主宗伯公原韻二章

不知移植是何峯  
拔地今成天矯龍  
左紐紋應儕老檜  
後凋名許配高松  
霜柯蔭合鳥呈瑞  
長公立岩時官侍御香葉年

深鹿絕蹤獨貫四時無  
改易自天雨露正濃濃

蒼髯翠甲映孑思  
不染人間半點埃  
自倚孤根堅鐵石  
對抽雙幹出樓臺  
陶家門外新栽柳  
王氏庭前手植槐  
何似先生扶正直  
少陵古栢行扶持自是神明力正直原因造化功階庭成就

栢梁材

盆中鴛鴦梅戲次許東垞韻

兩般顏色接栽餘  
香山詩樹接兩般花磁斗交花密  
復疎秦虢一門承寵日  
尹邢雙美入宮初  
淡粧濃抹休相妬  
傅粉施丹恐不如  
未免孤山高士笑笑他  
倚市又克廬

蚍蜉

大盜盜魯藏小盜盜墓木  
蚍蜉肯自量蜂蠆反余毒  
本根葛藟庇保已分良  
足此外何不容坦而示之腹

二月杪偕諸兄弟西阡看梅集句

安得健步移遠梅  
健如黃犢走復來  
春花不愁不爛熳  
只恐花盡老相催  
集杜

又一首

兩岸山花似雪開劉夢得一杯一杯復一杯李太白勸君更

盡一杯酒王摩詰二月已破三月來杜子美

三月三日塘西卓氏園看梅

兩月春苦寒閉門兩雪中名園一昔到天氣初和融徐

步盡深榛窅然苔逕通中有古梅樹閱人自兒童余年十三

四時讀書西水曾遊花開子孫枝樹亦成老翁不知幾

易主孤幹如焦銅良辰與我期噴雪當晴空清香襲襟

袂澹若松下風夕陽墮林西纖月張虛弓慙將塵土足

移入笙歌叢是夕沈氏叔姪置酒演劇故云

雨後玉蘭未殘適德尹自武原歸再飲其下此

樹弟手植者

不負春來約新晴果到家手栽當檻樹眼見出牆花比

雪偏能艷韋蘇州詩清如瑜不掩瑕兩翁心竊喜何啻

茁蘭芽雨點着花辦俱成黑斑故有第六句

馬衍齋筮易得漸二爻既以名其居復繪小影

坐磐石旁竹垞老人舊書于磐二字今以圖來

索題附綴數語義盡於卦無取旁求也

離于干即于磐起居無時惟石之安止以為巽兮木因

乎山于陵于陸兮抑豈鴻之所難

三年前手植牡丹閏月始花吟成八韻

爛熳三年約參差五尺叢稍遲因閏月最後領春工密

葉深流翠狂芭怒發紅扶頭香與力登頰酒無功日出  
光相射煙含態轉融憐渠風雨後慰我寂寥中臺榭移  
難定笙歌賞易終不如離色界長伴白頭翁

大雨枕上作

雷雨軒窗動孤燈耿夜深老人渾不寐大有惜花心

閏三月十一日拙宜園牡丹之期時晚研將赴

密雲城工兼以送別四首

臨事從容意於君見一斑開園仍郭內置酒且花間世  
已難希古天應未許閒寧聞白賓客垂老出香山

不道桑麻社中間有路岐幾時重會合此別各衰遲官  
罷貧誰諒身存病敢辭隨翁心似鐵難得好男兒

東坡  
送子

由北使詩隨翁萬里心如鐵自注猶  
子遲也今令子次也侍行故及之

草野聞朝議籌邊事不同鑿山甌脫外設險塞垣中路  
指屯雲戍城連避暑宮河湟方用武勝策轉漕功  
林下拋雙屐風前換短衣重為遠行役只望蚤旋歸王  
事程期迫京華故舊稀莫令招隱地歲晚寸心違

腰痛自嘲

平生恥折腰疆直詭自訟謂從解組後帶眼稍寬縱寧  
知患苦纏百衲鬪一縫向來所受病及是方覺痛

覺痛之日為  
受病之始也

論以

拊亦安用可憐血肉軀猥與蟣蝨共人間十萬貫騎鶴  
嫌腰重痛定吾有時身輕行試鳳

東坡詩身輕  
可試雲間鳳

苦雨歎

十日五日雨脚稠皇天害物肯待秋  
左傳秋無苦雨服虔注云害物之雨  
民所野花委地不如草林鵲置巢全為鳩雌蛟蝶飛何  
處去官蝦蟇叫無時休南山朝躋東海溢一老書空方  
坐愁

海塘歎

沙崩岬塌風駕潮潮頭勢與城爭高愚公移山或可障  
精衛填石誠徒勞海若東來神鬼泣尾閭南泄魚龍逃  
邑興大役官乏費行矣板築頃時操  
力役之征紳士無得免者少陵云板築不時操今日之謂歟

蠶麥歎

鳥鹵之地成梢溝  
水激蠶者為梢溝出周禮注  
傾都委貨爛不收村  
姑尚以蠶命月野老曾於麥望秋恤緯孰是織室者雜  
耕吾亦農家流縣符蚤晚急夏稅何暇更為百草憂  
黃翁云男女墮地衣食各有分齊安能覺額為百草憂春雨耶

復愁四章

今年陰太盛四月雨尤狂渡口浮橋斷門前暴漲黃坐  
看千頃沒立致一村荒歎息昂頭麥抽芽比穗長  
二麥而未登芒穗中發芽長寸許目所未睹也  
頓遣蒸薪貴難教米價低溼炊煙冒瓦罷汲井封泥俗  
累生誰免身謀老自迷藜床經月卧拄杖不輕攜  
古井長防塌先廬且幸存沉沉移白日耿耿向黃昏

敬業堂詩集卷四十五  
十一  
穴乘甄縫蝸涎上漏痕此中無客到何用掩蓬門  
箕畢占頻驗庚壬候總非鄰雞鳴不已梁燕乳相依賦  
肯憐蛙瘦人方羨鼠肥樂郊何處所舍此我安歸

敬業堂詩集卷四十五

敬業堂詩集卷四十六目錄

夏課集

喜東亭弟真歸見過

自五月不雨至於六月二首

得雨

橘蠹化蝶

立秋夜雨晨起納涼

秋暑三絕句

題毘陵徐思肖詩卷後四首

七夕前二日同德尹濬安飲東亭齋二首

秋庭

賦得雨中荷葉終不溼六

韻

雨後行田

寄吳少融二十六韻

八月初四日放舟至硤石

西阡桂六韻

南堂桂八韻

偕季方東亭德尹曾三諸兄弟過東林庵  
題周少谷杏林雙鹿圖為老友徐韓奕壽

臨平舟中

虎林與同年許莘埜話舊

時初自蜀歸四首

題安平泉上二首

曾濟蒼遠致秋蘭一本重陽前試花寄詩報之

世棄

吳起君重陽送菊至

後三日邀諸兄弟賞菊席上放歌

少睡

秃筆吟二首

問東亭病

隙光

芝田長子字西山賢而有文游學京師一病不起

旅櫬還家詩以當哭兼慰芝田

冬課吟效擊壤體二首

棄裘

長至

望歲集

元日喜晴

邑侯陳衡山壽十二韻

正月十八日偕德尹西阡看梅兼邀曾三芝田東

洲諸弟同飲花下三首

及門樓敬思自粵西遠寄潯桂

贈杖

補屋海棠萎而復甦偕德

尹芝田作用黃山谷體

再次芝田韻一首

聞副相揆公正月初六訃

音小詩寄哀四首 牆角郁李花盛放

連朝風雨園亭海棠零落都盡而瓶中折枝娟然

獨秀老夫欲不誇為佛力其可得乎

芥舟二首次祝尚于原韻

三月三日雨中潘竹村祝尚于周楚和三老人偕

赴德尹之招翁源姪不至席上口占寄嘲

重宿寒中書齋 制府滿鳧山同年奉 詔

巡海道經吾里詩以迎之四首

春盡日雨中招諸兄弟為櫻筍會

德尹於得樹樓後築屋三楹既成以詩落之

偶過鴛湖 與靈上人餉龍井雨前茶

二首

老友鄭寒村歿後五年其 子義門攜愛蓮畫像過余屬題得二絕句

梅雨

秋灾行 德尹第四子滿月詩當祝辭 盆中草花二種已含蕊矣

朝來忽萎 中秋夜與德尹對酌

十六夜復與德尹小飲弟有詩次其韻

秋花 五雜組九首

古詩四章

敬業堂詩集卷四十六目錄終

敬業堂詩集卷四十六

海寧 查慎行 悔餘

夏課集

起丙申五月  
盡十二月

長夏家居與德尹約為書課弟方纂輯北史余點  
勘毛詩注疏中有疑義互相剖析此情不異曩時  
所增者白髮耳

喜東亭弟滇歸

見過時德尹亦  
歸故居

艱辛憐遠別歡喜報初歸  
萬事付彈指一門多拂衣侵  
晨移爾艇觸熱扣吾扉  
相對成三老人間此會稀

自五月不雨至於六月二首

一月愁霖歎三旬亢旱憂雲從火山出溪挾沸湯流魚

鼈潛無所蝸蟾聒不休氣衰尤怕熱計日望新秋  
有客京華至為言赤地同不成驅鬼魅兼恐致蝻蝥莫  
瘞神何定精誠感或通仍聞漢廷議策免到三公

得雨

海色昏昏合雷聲隱隱鹿羣情希泥濘天意卹焦枯一  
溉功雖細千林氣稍蘇篝車吾且祝不敢笑田夫

橘蠹化蝶

馬縞中華古今注謂蛺蝶一名野蛾  
生江南甘橘園中不知乃橘蠹所化也

橘蠹凡兩種食心與食葉食葉者速化勢如靈鬼攝出語  
關尹朝為蠕蠕蟲暮作栩栩蝶公然委其蛻雙翅巧開  
合却向故枝頭飛飛繞三匝漆園方大夢與汝形相接

試問前後身依稀在目睫

立秋夜雨晨起納涼

飛雨灑然過小窗殘月明微風動秋意草木為先聲故  
人何方來樊川詩清風來故人一笑披衣迎端能起我懶天地非  
無情取用及須臾寸懷良已盈茲晨不雨且莫負鷄三  
鳴

秋暑三絕句

秋暑不減三伏天杖藜隨我來谿邊跳蛙自得坎井樂  
上有夕陽高柳蟬  
學書遠遜王右軍學奕無過王積薪日長如年大好睡  
小技何足勞吾神

布幔十幅當檐牙東南好風渾被遮床頭非無蚊遶髻  
案上幸少蠅集爪

題毘陵徐思肖詩卷後四首

郵筒寄我一編詩天然神骨清而奇騷壇家將生有種  
看取陣前姑蔑旗

宮體徐摛一變新傳家又得石麒麟年來吐吐欲跨竈

莫恠阿翁誇向人

戲用東坡尺牘中語

錢四才華世所稱乃郎筆力亦騫騰

謂同年錢綱庵父子

同鄉遂

有兩勁敵詩派今屬南蘭陵

狎主齊盟事不難竝驅應許八蹄攢老夫合退三舍避  
憑軾試從僻上觀

七夕前二日同德尹濬安飲東亭齋二首

水淺菖蒲港船通皂莢橋爲歡湏永日相過復今朝草

徑荒初闢桐陰薄漸凋歸休真上策何待蚤招要

同祖如同父爲兄黍伯兄家貧餘世業官滿得鄉評壘

醬調藜糝廚薑茝鼈羹向來疏酒盞一飽累經營

秋庭

秋來無一事物態頗相撩是葉湏防蝕無根不耐澆歌  
花危露蒂修蔓妥風條滿目皆生意吾庭未寂寥

賦得雨中荷葉終不溼六韻

爾本池中物翻從溼得乾出泥莖濯濯帶雨葉團團散  
作千聲去歛留一滴難高低承翠蓋大小走珠槃灑脫

渾無跡陰晴詎改觀肯同凡草木漏澤妄思干

雨後行田

水氣一村蛙晨光幾點鴉畦風涼病骨衣露涉秋花正  
爾關農事兼之遠俗謹桔槔閒挂壁勞苦及東家

寄吳少融二十六韻

時吳宰  
壽光

忽忽三年別遙遙異地情索居雖潦倒結念每迴縈憶  
昨同晨夕惟君獨老成吉人辭樸訥端士意肫誠踴步  
寧愁失冲懷敢自盈授經依北郭請業到西清榻愧陳  
蕃設詩容顧况評出攜青鏤管歸倭短燈檠績學承名  
父高才敵令兄少融爲梅村先生幼  
子西齋給諫愛弟向來留著作兩度  
費咨呈自我辭書局憑誰問客旌九衢千轍軌万事一

暮杵他日乘軒鶴當時出谷鶯先鞭輸祖述上第失楊  
英夜雨新豐市秋風古灌城得官隨本分爲政且神明  
側聽衣冠誦如傳襦袴聲科條煩是累民社寄非輕示  
俗因奢儉調絃戒改更免教同列忌休矯一時名此外  
佳眠食其他簡送迎陳編閒肯廢古道力能撐便欲觀  
風去殊難抱病行撫躬憂浩蕩回首歲崢嶸爲報鳴琴  
宰應憐撤瑟生西河餘痛在雙眼不曾盲

八月初四日放舟至硤石

習嬾常支戶乘涼偶放船渠清瓜蒞水露白稻花天夜  
氣鳴雞後晴光蕩槩前地平先見塢高出万家煙

西阡桂六韻

手種西阡桂三年漸看長玉蘭輸舊翠金粟試新黃露  
重朝流潤牆低遠遞香婆娑佳月色報畚好秋光敢擬  
栽爲柱差堪署作堂丁寧松檜伴稍待共成行

南堂桂八韻

五桂階庭樹迎秋候蚤催著花多四出得氣必齊開自  
我先人植仍資造化培好風香世界涼影月樓臺天上  
逃斤斧山中混草萊在家僧偶聚不速客頻來時衍齋  
東亭不  
會期而豆莢瓜瓢味兄酬弟勸盃最空星露下永夕與徘徊

偕季方東亭德尹曾三諸兄弟過東林庵

北郭吟筇罷東林講席收憶四十年前陪范  
文白先生來遊事能無三宿

戀復作五人遊攢掃庭常潔牋題壁尚留影前香一瓣  
來往記風流時坐旋法  
師影堂

題周少谷杏林雙鹿圖爲老友徐韓奕壽

杏爲仙人林鹿是仙人友少谷寫此圖卷舒落吾手愛  
其粉墨久若新畫又挂壁濃香熏朝來詩成畫亦往持  
以贈君兼壽君與君論交從壯盛通介看成徐邈聖我  
如麋鹿爾爲羣豐草長林同此性

八閩古臨平舟中

作雙白鷺起前汀西望山光的青暗數永和隄畔路  
宋趙諒父過臨平詩  
居人猶號永和隄一橋十里似長亭

虎林與同年許莘楚話舊時初自蜀歸四首

烹鮮滋味定如何叱馭行經萬里餘今日秋風吹櫂轉  
江鄉原不少鱸魚

冷曹需次問何司剩許閒編棘道詩五角六張成底事  
人間吉日是歸期

旗鼓相當膽氣麤生平事事不曾輸輸他對我誇年少  
漆點烏絲一尺須

同年難得况同鄉久別重逢感歎長百五十人餘幾在  
勸君狂得且須狂時連聞劉大山陳巨高李時夏三同

題安平泉上二首

自從兩乳垂天目中有神龍不測淵直到臨平山脉斷  
尚渟一眼在山泉

我讀咸淳潛守志曾收元祐罪人詩摩挲一片竹間石

好事僧稀問向誰

南宋潛說友咸淳臨安志云仁和縣安隱院地產曲竹竹間有池名安平

泉東坡題詩云按東坡題安平泉七律一首集中失載余曾采入補遺卷中今至泉旁尋碑碣不得故云

曾濟蒼遠致秋蘭一本重陽前試花寄詩報之

廣文能好事貽我婺州蘭不共三春賞翻從九日看同  
心如爾少獨立後時難待作幽人佩清香可耐寒

世棄

世棄身何與身間分已過讀書新得少見夢故人多黍  
熟來初釀池荒足敗荷東籬佳節近不醉擬如何

吳起君重陽送菊至

今歲寒氣蚤應節微有霜

是日霜降節

開門得君書遠致籬

下黃瓦盆三十本羅列成重行端如衆君子正色登我  
堂吾衰万事慵酌酒不盡觴何以畜佳貺託詩紀重陽

後三日邀諸兄弟賞菊席上放歌

吾鄙吳生字起君知余雅好忘余貧扁舟送菊乃無酒  
正及九九清霜辰招呼近從南北巷假借半出東西隣  
後庚三日稍稍集義取兄弟不及實有如田家大作社  
杖白頭者凡七人合年四百七十二雁雁排翅魚排鱗  
天公貺我美風日歲云莫矣行食新海蝦挾須白出縮  
椀蟹負殼紅輪困木瓢木杓傳父祖中貯兼味清而醇  
興來大壯客顏色詩好全得花精神人間所歷皆夢境  
至樂孰與田園真勿辭醉插滿頭去一笑正落陶家中

少睡

秋去寒猶薄冬來夜總長堦前黃葉滿門外朔風狂舊  
得休心法新傳養目方癡兒憐少睡檢曆勸移床

禿筆吟二首

久被宣城束縛加鐵梳膠綴老年華耗磨毛遂囊中穎  
零落江淹夢裏花縱不封侯追定遠誰能銘冢向長沙  
畫工掃壁休嫌禿會見騏驎出咄嗟

書不中書觚不觚也曾東抹與西塗姜牙斂手輸雞距  
虎僕藏鋒讓鼠須墨沼涸逃蓬館債硯田荒貸管城租  
免冠一博秦皇笑差勝中山穴處徒

問東亭病

天末清貧吏身還病亦隨用巫真下策勿藥得中醫漢書藝文志瘴霧侵肌重冰霜造物慈入冬思合醪為爾尚遲遲毛詩箋入必共族中而居又有祭脯合醪之歡

隙光

隙光野馬去如馳正是先生靜坐時病不求醫吾有命老方學易世無師回思少作雕蟲比轉悔餘波綺麗為喚起景陽來入夢擲將殘錦乞去聲丘遲

芝田長子字西山賢而有文游學京師一病不起旅櫬還家詩以當哭兼慰芝田

天心洵茫昧家運關彼此可憐兩長男相繼俱客死歸樞去冬亦於十一月到家倚閭冰霰後歸櫬風霜裏割愛難以慈

奪情莫若理明明聖賢教五十不致毀父母恩且然矧乃施於子吾本同痛者勸君兼自慰知其無奈何安命而已矣

冬課吟效擊壤體二首

炳燭餘光已可知假饒聞道敢云遲故人問我三冬課

六十年前上學時順治丙申余七歲方就傅

畫前有易易如何刪後無詩詩倍多更向誰邊討消息水從冰後不生波

棄裘

禦冬年已久毛禿僅皮存等是犬羊羶永辭狐貉溫留之竟安用棄爾似無恩改作吾何望茅檐去負暄

長至

天地有肅殺微霜爲驅除洎乎冰雪交慘者旋以舒來  
復子之半始凝履之初何湏當既剝然後觀盈虛

望歲集

起于酉正月盡九月

三年來元日連遇風雪歲事不登生理日窘朝來  
天色晴霽農占其有秋乎老圃望歲殆同老農也

元旦喜晴

一從朝請廢冰雪博高眠却展山中曆重瞻霽後天兒  
孫粗識字兄弟繼歸田此外非吾分隨人望有年

邑侯陳衡山壽十二韻

海角桑麻邑沙灣烏鹵田極知吾土瘠端賴令君賢侯

到纔期月民勞已有年上官頻按部下戶忍施鞭利器  
無盤錯長才展事權緩征舒積困雇役免齊編酌劑心  
良苦橋度弊悉捐政成單父速名媿太丘傳麗澤三春  
渥仁風百里宣初辰花照座佳氣柳含煙里老霞觴後  
村童篠馬前也應容野史來奏雅琴篇

正月十八日偕德尹西阡看梅兼邀曾三芝田

東洲諸弟同飲花下玉首

西麓寒梅樹年年二月開今年開獨早應爲兩人來

已是四回看憐渠閱歲寒同時手栽者松柏長偏難  
隨意致芳鄰壺餐勝鮓飯尊前一校點且喜人皆健

及門樓敬思自粵西遠寄海桂

隔年一信到何遲寄我潯州茵桂皮已向籠中儲上藥  
只愁天下少良醫情深遠荷門生致性在終於野老宜  
別與蘇家傳釀法搗香篩辣味尤奇

贈杖

倚賴支離叟扶持拙病翁長虞故步失不為暮途窮世  
乏三年艾家無五尺童用行吾與爾形影畧相同  
補屋海棠萎而復甦偕德尹芝田作用黃山谷

體

前年爛若雲錦堆去年憔悴無花開今年芳意莽復回  
人情貪多似嫌少却是花稀看愈好閱汝盛衰成我老  
白頭白白紅顏紅花如有語解勸翁夜闌莫放清尊空

再次芝田韻一首

隔霧看花三老翁未甘白髮負春工一梢欲墮胭脂雪  
幾朵猶含蓓蕾風爛熳人情沉醉後寂寥詩味卷帷中  
相逢莫漫嗟遲暮悟徹從知色是空

云句

原詩有相逢可惜已遲暮之句故結

聞副相揆公正月初六訃音小詩寄哀四首

宮內稱才子臺端倚重臣得君時最早歷試品尤真  
嗜苦餘千卷門閒少雜賓不知經幾劫還復有斯人

御月三臺墮文星八座懸望高虛相業才大損天年謝  
客終成佛

生平留心內典

王喬竟得仙所傷江鮑體無子孰流

傳

憶昨歸田後情親分不移爲憐吾已老長恐見無期急  
遞書頻達因風報輒隨半年遲作答魂夢至今疑  
何當承遠訃豈是誤傳聞四海誰知已餘生又哭君有  
文披舊橐無酒醅新墳不朽將安託從今硯擬焚

牆角郁李花盛放

碎霞剪綺綴繁枝

陸魯望郁李花賦  
碎細綺剪明霞

偏反阿儺自一時

春到軒庭無悴物又收常棣入吾詩

連朝風雨園庭海棠零落都盡而瓶中折枝娟  
然獨秀老夫欲不誇爲佛力其可得乎

兩株芳樹全搖落泥汙臘脂亦可憐值得拈華成一笑  
風災不到四禪天

芥舟二首次祝尚于原韻

蜃樓鮫屋總非真愛爾虛舟遠俗塵芥納須彌中有地  
杯浮滄海四無鄰琉璃貯篋團團鏡綫毯鋪筵寸寸茵  
容得兩三人坐否故應魚鳥自相親

水滿均堂柳拂梢不須結宇用香茅觸蠻有國爭蝸角  
燕雀何心占鷺巢茶竈筆床人共遠蔣牙菰葉影相交  
未能便作浮家去倘許門從月下敲

三月三日雨中潘竹村祝尚于周楚和三老人  
偕赴德尹之招翁源姪不至席上口占寄嘲

又是重三被禊期招尋也復逐羣嬉地偏俗儉人多壽  
歲美風和雨應時木芍藥花開正好野醪醲酒醉何辭

竹林一阮真疎放不豫吾流太好奇

重宿寒中書齋

桐又將花柳又綿山齋一榻故依然曾偕老友成三宿  
却話前遊過十年白髮昏昏中酒味青燈黯黯讀書緣  
只憂海近沙頽岸夜半潮聲撼客眠

丙戌秋與竹垞連榻齋中能無存歿

感之

制府滿鳧山同年奉 詔巡海道經吾里詩以

迎之四首

十年翠蓋不南巡千里巖疆寄重臣看取隨身三五騎  
肯教供億累州民

水蒞山陬被澤深兩邦旌節喜重臨每逢田叟停車語

徧示 君王愛養心

畚鍤千家傍海壩崩沙日費水衡錢福星昨夜臨吳分  
斥鹵重開負郭田

雲帆星鳥駛經過海外風恬可有波一事尚煩公入告  
兩關歲課本無多

春盡日雨中招諸兄弟爲櫻筍會

老去邀歡要及時肯緣泥濘阻前期舊年風雨正如此  
今日陰晴昨豈知入饌朱櫻貪摘蚤翻堦紅藥笑開遲  
兄酬弟勸更番事但到尊前醉勿疑

德尹於得樹樓後築屋三楹既成以詩落之

五架三間屋千竿万个園竹深堪障日樹老莫傷根北

慵斜穿沼南榮短界垣景難兼與曠意在適涼溫粗造  
規模具翻嫌布置繁移書驅僻蟲品石斥湖竈雞柵寬  
螻螳牛宮祝子孫誰爲張老頌聊托仲長言謝康樂山  
居賦仲長  
願言流  
水高山幸爾留閒地容余補壞樊一菴何日就笑指畫  
圖存

偶過鴛湖

村北村南綠滿陂溪山百里放船宜鳩鳴甚熟蠶三起  
燕掠風梢麥兩歧乍煖故知非雨候薄遊何必定花時  
兩湖地主今誰在每到徒增感舊詩

與靈上人餉龍井雨前茶二首

風篁十里郎當嶺官焙爭收粟粒芽慙愧老僧親手摘

青紗蠟紙餉山家

今年穀雨雨廉纖茶味全勝笋蕨甜正自不嫌山少肉  
肉山無此好毛尖

老友鄭寒村歿後五年其子義門攜愛蓮畫像  
過余屬題得二絕句

自脫朝衫換幅中祇應營道想前身  
儵然出處行藏外誰識完人是半人

寒村晚年病風能以左手作書畫自號半人

更有何人識雅懷一琴橫膝對花開  
多慙後死黃山谷曾見光風霽月來

梅雨

半月濛濛雨千畦釋釋耕麥租雖未入米價漸將平屋

老礎長潤庭虛苔任生吾脾方畏溼却立候新晴

德尹第四子滿月詩當祝辭

多男孰云累晚境人尤羨薛鳳乃踰三荀龍剛得半家  
門增喜氣當暑清風扇膩髮搓成團貫之五色線耽耽  
垂大耳皎皎開方面出左傳注騰上所未知豐下已可見我  
來拊汝頂爲汝祝初旦一祝兒長成再祝爺強健三祝  
好弟兄他年相友善

秋灾行

西流之火方蟲兼旬不雨亦不風先庚後庚凡五伏  
秋暑酷於六月中河流旱乾田拆罅誰遣天吳來潤下  
淡塘灌注味作鹹仍恐良苗變枯稼天乎降割此一方

相怨勿謂民無良神疴鬼瘧何處避且死那復論流亡  
老夫本病在腰腹不受淫邪外來觸只餘雙耳未全聾  
忍聽村鄰百家哭

盆中草花二種已含蕊矣朝來忽萎

霜後冬收子春來兩發芽關心經夏早滿眼望秋花忍  
負栽培力徒勞灌溉加童烏苗不秀能免于雲嗟

中秋夜與德尹對酌

今夕是何夕弟兄俱在家狂吞杯底月笑指霧中花老  
子興不淺達人生有涯底須愁後夜圓影蝕蝦蟇

十六夜復與德尹小飲弟有詩次其韻

既望猶未望今年異往年連宵雖博醉老景劇相憐但

有兒搖膝何須客滿筵好詩能賽月脫口自清圓

秋花

雨後秋花到眼明閒中扶杖繞階行畫工那識天然趣  
傳粉調朱事寫生

五雜組九首

五雜組玄黃帛往復還牛馬跡不得已主避客  
五雜組新嫁孀往復還遊冶郎不得已時世粧  
五雜組雙鷓鴣往復還兩蛺蝶不得已君棄妾  
五雜組刺繡手往復還貝錦口不得已掩耳走  
五雜組蠻氍毹往復還井轆轤不得已歸來乎  
五雜組羅浮雀往復還華表鶴不得已生處樂


五雜組青紫檀往復還新舊券不得已錢神論  
五雜組蝶戀花往復還蜂趁衙不得已東西家  
五雜組采桑綃往復還燕覓巢不得已思故交

古詩四章

天荒地亦老變化蕃草木自從開闢來悅人以紅綠有  
榮斯有瘁坐覺流轉速傳語好風光寧能銜無目  
衆虬國大槐擾擾成候王莊周化蝴蝶與物亦未忘至  
人豈無夢夢則超形相蟲蝗所不爭是曰華胥鄉  
域內有名山攀躋力可至人皆造其麓抑或半嶺廢歸  
來述所見彼此不相似等是未登峰毋爲笑平地  
徒歌易成謠獨唱難爲喁我琴誰我瑟我鼓誰我鐘知

音苟弗存奚取覲而逢遙遙千載下或有牙與鍾

敬業堂詩集卷四十六



敬業堂詩集卷四十七目錄

粵游集上

將有嶺南之行雨中過龔蘅圃侍御田居話別

早發富陽喜晴

桐廬

楨兒作釣臺詩未識嚴先生不受官之故徒以高

隱目之作一首以廣其意

三衢道中口號四首

早發常山大霧

舟發玉山

重過貴溪與同年王辰幟

明府

龍津阻雪

雪後渡彭蠡

南昌遇袁州太守葛廬賓

二首

南昌旅次答吉水令湯納

時表弟見懷四首 雨中早發南昌留別李塔

陽谷 豐城縣北十里磯頭山上

有曲江祠朱文公往還湖南時與李後湖姚雪

山遊此後人因奉粟主以祀三賢詳見李崆峒

祠記中今以韋武陽易後湖者訛也

樟樹鎮 泥溪口枕上聞雁

峽江縣 雨中望玉笥山

過桐江口不及訪同年李培園侍御以詩代東

螺山文丞相祠 青原淨居寺七祖道場

白沙渡 泰和城外望快閣

十八灘絕句 并序 惶恐灘

標神灘

綿津灘

大料灘

小料灘

武索灘

曉灘

崑崙灘

梁灘

青洲灘

銅盆灘

落瀨灘

狗脚灘

大壺灘

小壺灘

天柱灘

橫弦灘

鼈灘

自贛州換船至南安

過南安傷陳六謙太守  
與大庾令李阜如同年

度梅嶺題雲封寺壁 衣鉢亭

發南雄凌江方涸舟行一日纔十許里排悶成歌

偶閱楊誠齋南海集途中多賦桃花且有梅花應

恨我來遲之句余度嶺正值梅放時戲效其體

作十絕 晚過始興江口再效誠齋

體二首 冬暖

望韶石二首 韶州風度樓

雨發韶州 虎頭磯歌

十二月廿一日雪 彈子磯阻風

觀音巖 英德道中雪霽

英山二首 舟中即目

順風挂帆連下浚陽香爐清遠三峽

清遠峽飛來寺 胥口村


白堽岡浮石 沙口待潮

初至廣州與大中丞佟陶菴同年話舊六首

寓居仙湖街庭桂盛放

除夕 謝中丞餉節物

敬業堂詩集卷四十七目錄終



敬業堂詩集卷四十七

海寧 查慎行 悔餘

粵游集上 起丁酉十月  
盡十二月

丁酉夏同年有自都下來者傳佟陶菴中丞意遲  
余作粵東之遊背秋涉冬畏寒擬不出矣余弟查  
浦曾三至其地間語余曰嶺南無霜雪且兄生平  
游蹤所未到盍丁住焉遂於十月初俶裝明年四  
月由粵西旋里往反幾二百日檢點道中詩約如  
其數分上下兩卷錄存之

將有嶺南之行雨中過龔衡圃侍御田居話別  
小別倏三載相望渺參辰舊交半在亾邂逅得兩人喜

汝罷官後田居傍城闈我來叩門入迨此風雨晨問我  
將奚之有懷難具陳白頭萬里役正坐不耐貧顏年知  
幾何復爾聚散頻篋中有佳句在遠情彌親時侍御以田居詩藁

屬余作序

早發富陽喜晴

午辭樟亭驛夕抵富陽宿霜日曉初晴烟江寒更綠雞  
鳴茅宇近鴈下潮田熟萬株楓柏林散作錦繡谷平生  
山水興臨老猶未足聊復紀初程清吟待茲續

桐廬

山偏不可城千家聚成邑民居半商賈仰取俯有拾斬  
標起炭烟割林收漆汁托身覆載內生理隨分給壯年

不早計暮齒行已及莫怪杜陵翁茫茫百憂集

楨兒作釣臺詩未識嚴先生不受官之故徒以

高隱目之作一首以廣其意

武宣馭下如東涇課職東京亦孔棘

語見後漢書二一官

直欲臣故人此意先生應早識逃名事偶同高尚避辱  
心孤轉深匿羊裘一領却累渠苦被劾求相物色伏波  
謫生蕙苾珠侯霸得罪由司徒客星非將亦非相吏議  
可得加狂奴君不見璜谿老叟不自重出應于叟後車  
夢萬古江湖兩釣竿潛龍勿用鷹揚用

三衢道中口號四首

水落灘尤窄輕舟一葦容機心與機事那免怨機春

沙際集飢鷺修翎冷自梳  
孟嘗門下客大半食無魚  
兩岸丹黃色千家橘柚林  
勿嗤奴價賤顆顆鑄成金

明日川程盡聊為半日停  
多煩賢太守為我致輿丁  
謂新

培之太守

早發常山大霧

苦霧忽吞天去城不數武  
如行襄城野七聖迷處所  
初旭漸漸高寒光翳復吐  
盲然墜醉夢既覺乃停午前  
瞻懷玉峯峯峯垂白縷  
西江行在望未濟恐多沮

舟發玉山

高灘稠竹節尺水浮瓜皮  
前經彈子渦膠淺時有之路  
長景苦短坐送西南馳  
却憶前年歸正當暴漲時  
一程

破三日上水宜遲遲不謂下水  
船艱難亦如斯人生順  
逆境閱世老更悲

重過貴溪與同年王辰幟明府

我昨停舟爾下車三年重到勝當初  
冬來天氣晴尤美  
畫裏江山錦弗如  
宮况不離文字外  
時分校鄉闈  
風謠  
閒續笑談餘  
象山亦是先賢蹟  
好並鵝湖入志書  
紹山  
府重修鵝湖書院  
屬余編輯志書  
貴溪管內舊有象山書院故及之

龍津阻雪

地少雲多處風饕雪虐時  
客程當歲晏天意警年衰  
輕出自成悔  
端歸更勿疑  
平生多類此  
既往可勝追

雪後渡彭蠡

雪山四望開彭蠡豬其中天光落東北寒氣青濛濛獨  
往矯孤鶩羣飛駕高鴻沙明洲淑出葉潰枝顛空此行  
向南州聊慰離別悵三年女憶父千里兒隨翁生涯豈  
無涯作計誠匆匆寄謝宮亭神歸帆幸分風遠遊興欲  
盡一咲非途窮

南昌遇袁州太守葛賓廬二首

懷抱因君又一開人間洵有出羣才勿輕僻左宜春郡  
曾屈昌黎作守來  
南浦維舟不記巡眼前冠蓋一時新也知諸葛真名士  
來與貧交作主人

南昌旅次荅吉水令湯約時表弟見懷之作四首

與君稱中表同是庚寅生以我半年長白頭忝為兄揭  
來寂寞遊奈此離索情相望四百里一水空盈盈  
隨身乏長物投贈殊芟芟子貧乃過我報以雲藍牋陰  
成十四章字字珠琲圓稍增行笈重笑擲看囊錢  
世降士不情矯廉競稱高萬鍾避蓋祿半李分齏糟達  
者殊不然寓形隨所遭時無謝仁祖菜把恩亦叨  
同里兩湯生一登青雲梯謂西厓少宰一滯百僚底長恐簿  
領迷烹魚澆釜鶩好音良可懷逝將掃吾軌歲晚期汝  
偕

雨中早發南昌留別李壻暘谷

把酒對西山開船湖南浦數聲城上櫟幾點沙頭雨依

回骨月恩戚若去吾土老人情懷惡含語不得吐官罷  
有孤蹤路難無定主勿愁魚化鐵且作鴻遵渚朗咏白  
絲行行行忍羈旅

豐城縣北十里磯頭山上有曲江祠朱文公往  
還湖南時與李後湖姚雪山遊此後人因奉粟  
主以祀三賢詳見李崆峒祠記中今以韋武陽  
易後湖者訛也

贛江西南來天矯北走龍到此乃東折磯頭扼其衝是  
名曰曲江形勢險且雄扁舟清夜詠倡自紫陽翁同時  
李與姚杖履偕遊從三賢列祀典蔚為名教宗世俗不  
好古變置靡所畏作詩糾繆誤兼以警盲聾

樟樹鎮

舊名清江鎮

瀟灘流下櫂歌聲一曲清江見底清老樹不知生意盡  
尚憑古社占村名

泥溪口枕上聞雁

陽鳥踰彭蠡飄飄尚南飛晨光若前導羣起泥江濬數  
聲枕上過傾耳漸入微彼非我同羣安得相追隨我帆  
十二幅取用常半之何以不用全波濤怕歌危下有無  
底實旁有不測磯身乏雙羽翰爭先復奚為汝往太急  
急吾行故遲遲茲遊到嶺南諒亦難久羈歸時倘見待  
入春以為期

峽江縣

舊日周瑜埭今為小縣城踞高因峽勢隨地改江名潦  
縮漁添戶時清戍減兵大都從此去彷彿蜀中行

雨中望玉笥山

水遠山平四百里兩崖斗拔滄江起舟人遙指三三峯

名山記玉笥

有三十三峯亂插芙蓉雨新洗仙家縹緲往仙壇不道

人間路大難請看玉笥山南路漸近西江十八灘

過桐江口不及訪同年李培園侍御以詩代柬

念昨別京華君方入臺端操持紀綱地正色不可干如  
何神武門亦挂惠文冠早知世路隘不及山中寬自聞  
返谷村松竹為改觀築亭名補過於義恐未安古來賢  
達流要視進退間我欲賦頌人為君歌考槃勗哉承世

澤名節初終完

螺山文丞相祠

千古興亡恨忠臣末運多死難扶少帝生不愧魏科慷  
慨憂時策崢嶸正氣歌黃冠故鄉意廟貌在山阿

青原淨居寺七祖道場

錫泉一派接雷泉味是曹溪六祖禪欲識廬陵米貴賤  
憑師問取下江船

白沙渡

兩岸沙痕疑雪一村竹氣如煙風竿獵獵酒旆雨笠遙

遙渡船

泰和城外望快閣

西昌漢古邑地勢實開拓鏡光十里平倒影見城郭浮  
圖南北峙雙秀拱一閣緬彼白下宰流風宛如昨官清  
無俗情景勝擅傑作冰絃絕已久入境兩寂莫除却謝  
元暉澄江何處著澄江一道月分明山谷登快閣詩中  
旬也世以比元暉澄江淨如練云

十八灘絕句并序

按志自贛縣至萬安中有三百灘孟襄陽所謂贛  
石三百里是也然陳書云贛水本二十四灘武帝  
發虔州水暴漲高數丈三百里巨石皆沒止存十  
八灘耳世稱十八灘者當本此明嘉靖朝湛甘泉  
自南司馬告歸過此作十八歎今得詩亦如之各  
取灘名中一字為韻非云相襲亦勞者自言其情

而已

習坎險在前何人不惶恐到此退已難應思急流勇

右惶恐灘

巨石浮牛背亭亭鷺足翹入鷗羣不亂愛汝好風標

右標神灘

連日遇石郵湖洄良苦辛滔滔天下是不問久知津

右綿津灘

舟人買紙錢例拜灘頭廟來朝風順逆今夕誰能料

右大料灘

後灘接前灘川脉互縈繞人間爪牙毒為害長在小

右小料灘

問言洵有神受命若酬酢借取方便風泥行免郭索  
右武索灘

侵曉上曉灘我睡不覺曉向來坐有心憂患亦不少

右曉灘

萬里黃河水崑崙乃發源贛江源漸近應號小崑崙

右崑崙灘

虔吉此分疆灘聲一倍長人家盡柴步墟落半漁梁

右梁灘

雪少偏多雨朝昏水氣腥青洲洲畔草臘月已青青

右青洲灘

礪礪相摩盪驚濤盡日喧直同雷奮地不獨雨翻盆

右銅盆灘

大波深為淵小波淺成瀨安得并州刀剪此青羅帶

右落瀨灘

長年生狎水豈有不龜藥幸自少層冰可憐多赤脚

右狗脚灘

莊生工寓言率以小况大必若魏王壺人間能幾箇

右大壺灘

失勢落江湖中流賴一壺千金奚翅直人有不賞軀

右小壺灘

劍戟礪鋒鋌森森兩旁吐狂瀾障不得為欠中流柱

右天柱灘

石欲截江斷江流奮怒前來如弓挽強去若箭釋弦

右橫弦灘

用盡灘師力今朝過鯨灘我無牛酒犒愧爾報平安

右鼈灘

自贛州換船至南安

八境圖中路西來五換船鄉心同北望客况異南遷東坡南遷時作虔州八境圖詩秀嶺標雙檜清流穩一川好風三百里計日指蠻天

過南安傷陳六謙太守

太息南安守居官僅二年如何千丈氣竟掩九重泉宦業孤孫盡書名一郡傳經過少交舊回首極凄然

與大庾令李阜如同年

同年四開府百里獨棲鸞邑是衝煩邑官仍本分官季宰新城別來顏各換此去歲將闌珍重留行意猶餘舊眼看

度梅嶺題雲封寺壁

閱盡波濤險阻途頓教硤确失崎嶇梅花遂裏三關戍錫杖泉邊六祖孟過客儘貪風日好居僧曾遇雪霜無他生行脚緣猶在又入騎驢度嶺圖

衣鉢亭

夜半傳來消息真本無明鏡自無塵問渠衣鉢留何用猶有焚衣毀鉢人明魏莊渠事

發南雄凌江方涸舟行一日纔十許里排悶成

歌

凌江歸壑當深冬城隅纔可溝洫通麤砂細石單槽中  
直與船背相磨礪船頭纖纖船尾大舵師束手輪篙工  
篙工作力如羆熊腰身寸寸彎彊弓蟲行禪縫蟻旋封  
跛羊登山鷄遇風不聞癡鈍有若此歲聿云暮愁衰翁  
愁衰翁翁行作歌歌未終羊城尚隔千里外一夜夢逐  
南征蓬

偶閱楊誠齋南海集途中多賦桃花且有梅花  
應恨我來遲之句余度嶺正值梅放時戲效其  
體作一絕

我來時候異誠齋不見桃花只見梅博得口占詩一句  
千枝齊向臘前開

晚過始興江口再效誠齋體二首

始興江口水平川從此通流到海邊我是漁船釣竿手  
又攜簑笠上樓船昨喚吉安漁船至顛今所坐乃廣州樓船按樓船之名見漢書今仍此名不必皆官舫也

一重山轉一重灣不出孤帆向背間行過前灣試東望  
夕陽多在隔溪山

冬暖

榕葉交陰筍出窠南中冬律似春和敝裘韞在猶嫌厚  
老研冰消可待呵蚊到宵來飛不少蠅於秋後集還多

所嗟無補桑榆暖奈此霜髯雪髻何  
望韶石二首

西瞻蒼梧雲北望洞庭野浮光表靈闕古樂傳奏雅  
聖主不南巡羣峯赤如頽魚龍久寂莫孰是聞韶者  
好風自南來吹彼松竹林鏗然中音會中有太古心典  
樂者誰歟蕭韶此遺音虞廷去我遠俯仰成古今

韶州風度樓

公進千秋錄開元極盛時知幾同列少去國一身遲終  
始全臣節安危動主思高樓瞻画像風度儼須眉

干林香雨發韶州

蒲帆十幅去不停波光瑟瑟烟冥冥芙蓉驛南一回首

三十六峯雲外青

虎頭磯歌

在太平關南十五里

亂山少肉谿乏泉渴虎下飲清泠川飢蛟掉尾不得取  
化而為石形模全白章黃質毛斑斑四蹠陷沙行不前  
尻雕起伏脊蜿蜒當頭一眼射的圓北平將軍身未到  
沒石飲羽誰所穿眈眈下視流饒涎坐踞要津凡幾年  
國家封域拓海壖山珍水錯來無邊賈胡萬里逐貿遷  
到此躡躅羸豕然畏虎欲避無由緣我思走章牋碧天  
霹靂暫借雷公鞭仍驅爾輩入山去毋令為害于商船

十二月廿一日雪

我作冬暖詩蚊蠅憎瑣屑天公似解嘲半夜風挾雪舟

人報奇事起掃一篷白客子亦欣然千岑無寸碧梅花  
落已盡春事蚤狼籍長恐百卉腓陽機畢漏洩却將粟  
烈氣孛歛使凝結乃知朝來寒特為桃李設豈無雷雨  
候候至方甲拆留取道旁春明年作佳節

彈子磯阻風

曲江入海流一縷縈驚蛇中逢彈子梗格鬪逞角牙狂  
颼鼓狂瀾噴石作雪花艚郎好身手過此不敢誇筮易  
遇涉川利用需于沙南遊本無事汲汲奚爲耶但使蹤  
心平何憂前路賒止時吾泊宅行處吾浮家

觀音巖

石縫何年裂中央架小龕老僧如燕子乞食語呢喃

英德道中雪霽

輕冰結沮洳飛霰集阜岡樽桑東南枝炯炯呈初陽地  
暖劇流濕天空淡浮光英山碧差差英江綠泱泱不知  
夜來雪疑是朝來霜

英山二首

曾從畫法見磬頭董巨餘蹤此地留漸入西南如噉蔗  
英州山又勝韶州  
一拳一角總峯巒可惜天教落百蠻好事吳兒渾未識  
買園只鑿石公山

舟中即目

屋角菜花黃映籬橋邊柳色綠搖絲分明寒食江南路

賸欠桃花三兩枝

順風挂帆連下滇陽香爐清遠三峽

巴東三月昔聽愁嶠南三峽今則不北風晨發涇浦縣

英德舊名涇浦吹我桂檝沙棠舟峽中之山阻且修峽中之水

平不流滇陽畫屏地底拔大廟紫煙天際浮就中清遠

更秀出造化有意窮雕鏤青菡萏花萼競吐綠玻璃鏡

奩初收華陽道冠簪碧玉竺國寶髻垂珠旒仙人笙鶴

雲渺渺帝子環珮風颺颺漸行漸遠似相送一重一掩

如相留片帆飛渡二百里又見孤墻迎船頭天憐此老

太岑寂貺以奇景須詩酬人間夷險非境造自我發興

成清幽君不見東坡先生海南向平生奇絕誇茲遊

清遠峽飛來寺

兩崖勢欲合中被江流穿上有佛者盧飛來自龍眠

通中事詳載寺記中神人所施設是物無頑堅想當初闢初風雨

驅神鞭鑿開渾沌竅巧貯聰明泉僧房若蜂房一一皆

倒懸爾來幾閱世不計草木年磐石具生機長根外包

纏波濤潤其趾日月行其顛散為松柏香聚作梅檀烟

菽蔚東西景軒豁子午天呼猿名洞在半空日暮躋無緣

清寒難久住仍放出峽船

胥口村

玉鏡臺何處江形就海低地有玉鏡臺相傳安期故蹟地平山斷續

潮滿岸東西生理漁樵足人家竹樹齊天涯各風俗孤

客自淒迷

白塢岡浮石

萬古江心石回江使倒流潮頭爭出沒山骨判沉浮按

白塔岡在三水縣東南臨水水中有石浮沉各一鷺鴨寒來集黿鼉夜出游漁

翁牽小艇故傍沙頭

沙口待潮

艇子膠沙背坳堂等置杯何須愁日暮會有夜潮來

初至廣州與大中丞佟陶菴同年話舊六首

五年一別隔蓬萊芳訊遙傳庾嶺梅天上故人開府出

田間野老輟畊來山高海濶梯航路武達文通將相才

竊喜小詩言果驗濟時餘力正恢恢余出都時留別詩云君才畢竟為時

用故落句及之

雙闕浮光氣象新雙闕浮光照短亭東坡題盡善亭句也天教八座代

南巡誰能地望兼門望君本親臣又世臣行處風霜成

化雨坐看冰雪變陽春眼前袞袞皆時彥可有同心共

事人

端倪軒豁得奇觀浴日亭邊眼界寬兩袖有風驅瘴癘

百蠻無警靜波瀾封疆自昔雄茲土科目人今重此官

見說密章時入奏葵心何處不輸丹

恩深自覺心逾小才大何妨氣獨豪節鉞威名行地遠文

章壇坵比官高中郎題字推黃絹太白分光屬彩毫莫

咲將貽無俗物一條冰是舊同曹時以耿絹潮筆奉贈

詞人例作嶺南遊自嘆蹉跎到白頭浪跡又看成萬里  
著書何敢望千秋誰為善相肥嫌瘦世有知音唱或酬  
輸爾滕王高閣句一時吟徧十三州

中丞過南昌有詩上滕王高閣望章

江門外有清流之句為西江傳誦

敢將孤鶴齒羣鴻性癖終難與俗同天下迂儒猶賸我  
平生知己孰逾公曾陪供奉雲霄上每憶交親氣槩中  
今日相逢重戴笠下車還見古人風

寓居仙湖街庭桂盛放

客居澹無事庭下獨徘徊忽有微風度香從何處來家  
童走相報檐角桂花開想到窳軒外此時方試梅

除夕

去國八十日計程逾六千長虞行不到到此及殘年無  
復聞銅臭

此間不用錢故戲及山谷語

惟應煮海鮮蛤蜊與蚶醬隨

分佐梓筵

謝中丞餉節物


節物煩分餉殷殷地主情雖云施不報肯使受無名  
筋沾皆足庖廚愧已盈似憐藜藿腹曾飽大官羹

向在內廷

歲除例賜羊鹿雉兔魚酒

敬業堂詩集卷四十七

敬業堂詩集卷四十七



敬業堂詩集卷四十八目錄

粵游集下

羊城元日試筆戲呈中丞公

二日中丞招遊署後園池分賦六首

過前輩梁藥亭故居 立春日張梅麓前輩招飲

雲麓堂 喜晤藍公漪

人日雨中遲公漪不至

謁南海神廟 附終中丞和詩一首

海雲寺四首 與姚明府齊州二首

花田咏古 珠江權歌詞四首

大行 皇太后輓歌二章

敬業堂詩集卷四十八目錄

呈前輩鄭珠江先生 偕梁孝穉遊法性寺有懷  
心月上人兼示希聲學子四首

長壽菴坐湛菴禪師方丈聽談石公舊事

齊州於縣治之左新開園池名梅花村暇日與客

同遊索賦

上官竹莊為余寫青山歸

權圖公漪有詩戲次其韵

為友人題暮雲春樹圖二絕句

佟醒園以騎驢出嶺圖小照索題戲作六言律詩

一首

題翁蘿軒為藍公漪所畫

枯樹小幅

有以白菜餉中丞者中丞

有詩屬和韵

王符躬舍人席上贈許蒼

嵐

清涼山莊圖符躬屬題

正月晦日喜雨中丞見示原韵即以志別

題上官竹莊羅浮山圖

光孝寺與咲成上人 次韵中丞公夢羅浮作

將發珠江遇李約山觀察自粵西來訂同歸之約

海幢寺十二韵

二月八日初離廣州

舟過三水邑宰徐君來晤口占贈之

羚羊峽

朱觀察紫垣席上賦贈二

首

戲東高要令王寅采同年

登端州城東閱江樓

望七星巖

題寅采同年小照

題李峻瞻移情圖

震石

有序

望夫山歌

封川

梧州

雨中飲梧州郡守范拙存署齋

與郡丞趙默菴話舊有感

逆風上灘歌

雨中過昭平縣與馬莘叟

龍門峽

佟中丞貽我羅浮蜨蘭數

十枚三日前雙蜨先出置之籠中朝來風日晴

暖栩栩欲飛因開籠放之

楊誠齋詩有韶州山又勝雒州之句余過英德為

進一解曰英州山又勝韶州今日行至平樂城

南群峰競秀爭奇目不暇給英山又不足言矣

問之士人無能舉其名者然不可無詩紀之也

晚泊劉公渡望對岸諸峰

陽朔縣

春燒

桂江舟行口號十首

飲同年叢汝霖桂林學署

兼志別

上巳前一日發桂林

靈川縣齋清明

平蠻歌為靈川令樓敬思

作

樓敬思朱襲遠追送于大

融江賦三言古詩為別

靈渠行

夜泊鐔背伏波祠下湘灘

二水分流處

興安田家

夕抵全州城外

零陵道中

敬業堂詩集卷四十八目錄  
題涪溪寺中興頌磨崖碑後

三月十五夜湘中見月

過郴江口有感于杜工部事

望衡嶽

淶口沽酒

醴陵縣

前過常山玉山今過醴陵

萍鄉四縣令同以一事去官偶紀之

自相東驛遵陸至蘆溪

復入舟

盧肇宅在宜春城外今為

學宮石筍一株猶存相傳唐時故物也

分宜感事

清江道中

重泊鉛山河口却寄施淳如

朱甥德璵出家為僧法名某號渭宗今住沙溪靜  
室舟經其處留詩一首

自題粵游草後二首

敬業堂詩集卷四十八目錄終

敬業堂詩集卷四十八

海寧 查慎行 悔餘

粵游集下

起戊戌正月盡四月

羊城元日試筆戲呈中丞公

風光六十九回新老客殊方愧此身  
殘臘雪消正月暖  
閏年曆報兩頭春  
滄溟出日長先旦  
斗極移杓又指寅  
聽說官清民樂業  
便思長作嶺南人

二日中丞招遊署後園池分賦六首

昨枉嚴公駕今逢袁紹杯  
到來凡五日相見已三回  
禮豈為吾設花應待客開  
小莖何太早紅雨點蒼苔  
北闌逶迤徑東連宛轉城  
越臺當戶秀天井入池清倚

檻堪垂釣聞歌想濯纓向來瀟灑意只視此官輕  
老樹何人種名園此地無自多新氣色無改舊規模曳  
杖馴麕子看松長鶴雛恍疑蓬島近不似在城隅  
勝踐烟霞外春風步履初餘恩沾草木得性狎禽魚巖  
壑真同趣亭臺画不如板輿迎養便未許賦閒居  
竹密晴疑雨林深暖亦寒不知官閣好但覺旅懷寬蠻  
果充拌飮江鮮佐食單平生滋味薄相對勉加餐  
此外無賓客應憐老病翁交原因臭味賞亦到兒童  
時橫侍憂樂論先後行藏感異同却將詩送日良晤詎匆  
匆

過前輩梁藥亭故居

風流雲散兩茫然轉瞬前遊十五年  
癸未春余入館先生散館獨客  
遠來朋舊少貧官沒後子孫賢買鄰古有千金語遺橐  
今為萬口傳話到五交宜廣絕西華葛帔復誰憐

立春日張梅麓前輩招飲雲麓堂

仙萸五葉撰良辰畫繡還鄉恰及春海內久推黃髮老  
堂中猶侍白頭親金花彩勝隨年換銀燭華燈照座新  
今夕從君論出處始知天地有完人  
時張以養親告歸

喜晤藍公漪

藉甚榕城叟才名洵不虛氣吞三斗墨筆吐五車書客  
况浮萍合交情碩果餘臨邛有賢令  
謂姚番馬齊州猶足重相  
如

人日雨中遲公漪不至

夜夢羅浮春碧莢千樹霞醒來枕上雨落盡城中花東  
風冷咲人謂若坎井竈當門列雉堞雲霧重周遮我懶  
不能出招呼及鄰家速客客不來舉杯還自嘆一歡難  
強致由命匪由他

用昌黎語

謁南海神廟

姚侯送我遊黃灣澄江一道晴無瀾黃昏到岬天色變  
徹夜震撼號驚湍平明謁海神雲氣解駁光斑瀾殿中  
擊銅鼓聲落海外迎潮還巡簷繞廊看古碣手剔碧蘚  
青苔斑或欹或仆或屹立節角劇殺形模殘煌煌

御書碑迴出唐宋元明間浴日孤亭表其右七十二級

直上窮躋攀不知搏桑出地幾千丈頓覺東西南北四  
望無遮攔驪龍吐珠蛟歎涎陽烏擊水鼉移山祝融分  
位當炎躔萬象呈露秋毫端紫霞紅浪上下兩摩盪中  
有萬點風檣竿星流電掣到廟下一一椎髻垂花鬢吾  
皇膏澤被百蠻遠人畢至邇者安自從計臣握竿變新法  
鹽筴纖悉多歸官廣川大澤禁漁獵網漏魚鼈羣生慳  
問神受封今幾代蒿目豈不知時艱 國家大事必祭  
告謂是正直靡欺謾幽明疇蠻一氣旋憂樂當與民相  
關曷不草綠章為民請命 恩宜頒但使方隅獲沾山  
海利神亦坐享血食無慙顏

附擬南海神荅查悔餘先生謁廟詩 佟法海

先生蒼顏鶴髮七十強磊磊落落詩名天下揚笠筇  
鞵芒屨竹杖水浮陸走萬里來炎方羅浮神仙窟羊  
城富貴場掉頭兩不顧輕舟獨泊賊旗岡徑上七十  
二級浴日亭愁看陽谷金暈浮扶桑直入廟中搗銅  
鼓鼓聲遙撼零丁洋蒿目時艱不可說惟神若可默  
贊襄高歌如慕復如怨怨到海神神亦傷自從祝融  
宅南海風非古昔俗講張田荒莠長蝨蟲活常平十  
郡封空倉一水虎門扼衝要雕蹄鑿齒通來王珠璣  
翡翠珊瑚樹玳瑁靈犀琥珀光罔象見利亦忘義擲  
揄壑斷雜官商鹽法榷法不可問山盜洋盜爭強梁  
職守一方司民命安敢坐視蒼生殃獨憑正氣觸百

恠幾夜辛勤草綠章豈知山鬼足伎倆陰晴播弄蔽  
太陽茫茫萬里九天遠狂風吹倒百鍊劍古來天定  
能勝人人定亦能勝彼蒼吁嗟乎人定勝天可奈何  
尸位不去慚顏多詩家若有幹旋手請君更作回天  
歌

海雲寺同藍采飲王符躬作

波羅廟下凌晨發直到雷峯弭畫橈  
綫春流通斷港  
華鯨南應虎門潮

水窮雲起得禪關突兀樓臺數十間  
曲曲迴廊隨步轉  
不離平地却登山

木棉兩樹寂稱奇拔地叅天萬萬枝  
自咲杖藜來較蚤

不關渠事作花遲

一龕容得十方僧個是天然第二燈更約羅浮觀日出

尋師還上最高層

往持塵異時  
往華首臺

與番禺姚明府齊州二首

僕指修門別俄踰二十年君顏猶白哲我髮已華顛毛

檄差堪喜王鳧自得仙春風花滿眼及此話前緣

簿書原不俗插架有牙籤詩好人人說才優事事兼肯

教同列忌難得上官廉驥足行將展毋須嘆久淹

花田咏古

鴈翅城南寂寞濱芳華小苑已成塵珠襦夢斷鴟嗥曙

粉麝香消雨洗春翠輦幾經偏霸主素馨曾識故宮人

賣花擔上東風信流轉人間又一巡

珠江權歌詞四首

一生活計水邊多不唱樵歌唱擢歌蚤子裹頭長泛宅

珠孃赤脚自凌波

剪得青蒲織作篷平鋪如席卷如筒往來慣是乘潮便

不使朝南暮北風

生男不娶城中婦生女不招田舍郎兩兩鴛央同水宿

聘錢幾口是檳榔

米價高于珠價無就船剗蚌換青蚨近來官長清如水

不是珠池亦產珠

大行仁憲恪順誠惠純淑端禧皇太后輓歌二章

形史媧皇紀徽音 壽母賢手襄開荆業坐閱太平年  
典禮三朝備哀榮五福全北山松頂月移照賁重泉

鳳輦承頽地龍樓問寢晨 一人隆孝養萬國仰尊親

海角宣遺 詔宮中閱早春朝班瞻望遠淪落泣孤臣

呈前輩鄭珠江先生

鄭公青瑣彥雅尚寄林泉在野長憂國觀空晚入禪與  
時疎應接顧我數 周旋此意能無感依杖履前

借梁孝穉遊法性寺有懷心月上人兼示希聲

學子四首

有約尋僧去攜筇出郭賒東風吹白髮春事到梨花石  
畔三生路林間一味茶橫枝不傳法消息問誰家

一片青苔色當門屐齒留近身無俗物望遠得高樓轉

覺城中隘真宜象外遊折腰吾不慣到此小低頭

心公影  
堂在焉

欄楯遙相望中開一畝池波明堂欲動魚樂我先知惠

遠流風在柴棗入社遲勿嗟耆舊盡弟子總能詩

心公結詩  
社于此

蓮漏晨猶滴齋鐘午罷敲沙彌通佛性居士慰神交

喜晤周  
乳峯

庭長枕柳節甯臨翡翠巢重來應未厭幽事滿

西郊

長壽菴坐湛菴禪師方丈聽談石公舊事

津梁誰得限傳法到交南涉海如航葦還山遂築庵劫

難逃宿業風不動毘嵐賢嗣真龍象千鈞獨力擔

齊州於縣治之左新闢園池名梅花邨暇日與

客同遊索賦

蒼苔一曲轉東垣廢地俄成十畝園行處軒窓多入畫  
望中花柳却疑村南通海眼安池位北引山光落酒樽  
直作吾廬吾亦夢萍踪隨水欲生根

上官竹莊為余寫青山歸權圖公漪有詩戲次

其韻

舊聞五嶺皆炎熱到此能無憶冷泉不謂留行無地主  
老夫興盡却迴船

為友人題暮雲春樹圖二絕句

渭北與江東斯人兩不作借取一幅圖為君論詩學  
暮雲與春樹此景世不乏借取一聯詩為君論畫法

佟醒園以騎驢出嶺圖小照索題戲作六言律

詩一首

我愛竹莊妙手為君寫此橫圖天南豈無鴻雁醒園與中丞為

兄弟行故云嶺北猶聞鷓鴣莊言非馬喻馬佛說騎驢覓驢

一笑不離行脚阿誰先取歸途時余亦將歸

題翁蘿軒為藍公漪所画枯樹小幅

故人垂老交情為寫枯枝贈行喚起羅浮春夢來聽紙  
上秋聲

有以白菜餉中丞者中丞有詩屬和韻

閉門風味宛然存菜把猶多餽送痕傳語園官須手種  
巫乘春雨斲籬根

王符躬舍人席上贈許蒼嵐

許侯天下才曾宰樂昌縣官如已墮甌棄去胡足戀避  
迨結襪生呼朋開廣宴君乘斑駟來遇我心相善昨日  
誦君詩今朝識君面冰壺貯秋月表裏皆可見平生千  
丈氣對酒尚豪健一吸盡一升卷波看白戰商聲帶河  
嶽風日為之變我欲和此歌朱絃忽中斷

清涼山莊圖符躬屬題

舍人示我山莊圖生綃橫展五丈餘良工三年寫始就  
金谷鞦韆何足摹君家舊住清涼麓萬里江天入遐曠

故應胸次豁然寬占斷此山猶未足石頭城門一旦開  
千巖暖翠排空來珊瑚碧樹好顏色照耀初日生樓臺  
樓臺高下無重數徑轉溪迴總迷路標題一一都有名  
毫末微茫指其處問君結念母已奢洞天福地歸一家  
潰成奚翅萬金產還恐山林跡尚賒君言好事皆虛事  
架構良難畫差易未能依樣買園亭午可隨身蓄巾笥  
海山兜率吾不知此圖要亦人間稀神仙只被瑤京誤  
楚鶴何天不可飛

正月晦日喜雨用中丞見示原韵即以志別

風花半落經春暖雷雨初來送曉寒農事相關公最喜  
物情不隔我同歡雞鳴如晦方懷友蛙鬧何知豈為官

借取一篙清漲水野人歸欲濯纓冠

題上官竹莊羅浮山圖

大瀛海外有十洲巨鼇不上龍伯鈎何年背負蓬島至  
兩山合一成羅浮奇峯三百三十二一豈易窮冥搜  
眼中孰是好奇者上官山人今虎頭山人欲爲山寫照  
直上崔嵬走翫翫朱明古洞華首臺佳處真能領其要  
歸來繪作指掌圖萬象攝入摩尼珠綠毛鳳挂佛子髻  
五色變化仙人襦我方神遊力不足爲爾題詩展橫幅  
正緣身不在山中識得羅浮真面目

光孝寺與咲成上人

訶林冠嶺外重是古道場摩挲菩提樹躡躅風旛堂不

見祖師面徒拈一瓣香上人方坐雨咲客疲津梁

次韵中丞公夢羅浮作

有意遊仙事竟違羅浮未到我空歸輸他準勅狂開府  
夢裏乘鸞獨自飛

將發珠江遇李約山觀察自粵西來訂同歸之

約

世途歧出處長恐見無從只隔東西粵相望千萬峯君  
其李元禮我豈郭林宗江上同舟約何期邂逅逢

海幢寺十二韵

阿字禪師道場

洞宗衰復振派衍自天公半是逃名客羣稱出世雄雲  
幢標郭外香界湧南中填海爲平地參天起梵宮歛成

疑鬼運幻出儼神工穗石浮佳氣朝臺拜下風五仙皆  
法護十力盡神通躡踏諸方徧跣跌片席崇我來塵世  
隔師去影堂空法供瓶爐潔齋厨菜鼓豐映階篁竹翠  
耀眼木棉紅綠境他生結畱詩記此翁

二月八日初離廣州

來時麥苗綠歸路麥穗黃南方冬春交物候總不常可  
憐百萬元戶戶資春糗曩苦食無鹽今愁米價昂温風  
送微雨中有餅餌香忍飢待食麩差勝犁遷荒

荒老荒  
等名

舟過三水邑宰徐君來晤口占贈之

徐由庶常  
改官新益

茲  
土

三水合流處孤城近海壩誰知花縣宰舊是玉堂仙毗  
俗觀新政官情耐左遷天涯相識少為爾一停船

羚羊峽

兩崖挂羣龍下飲一江水水窮山忽住水轉山復起草  
木所不生石頑盡橫理惟聞露猿叫杳杳雲霧裡

朱觀察紫垣席上賦贈二首

我識朱公子佳名在棗香承家新節鉞開府舊封疆才  
大移風速官閒化日長三州行按部處處有甘棠  
昨入中丞座險君唱和詩法從前輩得清受大僚知細  
雨凝香室春風畫戟枝掣鈴容墊老雲樹慰相思

戲東高要令王寅采同年

崧臺君暫憩雲嶠我間關白髮重携手青春好駐顏  
開鸚鵡眼香點鷓鴣斑割愛煩斟酌無喻二者間

登端州城東閱江樓

好事何人送酒來自扶雙屐躡崔嵬山從迴雁峯頭落  
潮過羚羊峽口回浩浩風聲隨几杖濛濛蜃氣出樓臺  
天公不薄將歸客霽色今朝為一開

時久雨乍晴

望七星巖

維北有七星天樞永不移寓形忽墮地幻作岩壑姿我  
登閱江樓高咏慈恩詩七星在北戶一一俯視之此生  
名山遊待了婚嫁期泊乎婚嫁了筋力恒苦衰輸他有  
力人濟勝忘嶮崎猶賢無目者興到目尚隨

題寅采同年小照

身為端溪主不蓄端溪硯賓戲主不知佐頭方展卷

題李峻瞻移情圖

江峯不比海山深鼓瑟何如聽鼓琴不是琵琶箏笛手  
莫從人境覓知音

霍石有序

南中英石硯山多出工匠補綴而成惟產自沙土  
中天然無刻畫痕者斯為上品余歸笈得二枚焉  
一為佟中丞所贈峯勢迥環中穿六孔一為姚番  
禺所贈勢若飛雲孔大小倍之以尺度之長皆三  
寸許世所稱皺瘦透者殆無美不備此遊獲此亦

足以豪矣今日行過德慶舟中無事羅列几案賞玩不足紀之以詩

韶州山石奇英州山石秀人言奇者雄不若秀者瘦蒼龍骨離立歲久色微黝脫落之而鱗深埋無底實結成岩洞勢潤被沙水漱玲瓏具本性感縮聚眾皺斧鑿絕纖痕中虛互通透偶然遇好事不恪高價購置之几硯苟命曰小雲岫一拳殊不易况敢望多又而我獨何幸歸舟諱日富熊魚兩得兼彼美適邂逅款款儼欲飛翩翩若相就人間陸賈裝金玉雞單究千金真俗物至寶肯輕售何如落吾手出入在懷袖再拜謝故人茲情亦良厚

望夫山歌

杜鵑花紅映白杜鵑鳥嘯吐血阿夫去作海上客阿嬾山頭化為石望夫不歸兮可奈何蠻風蜚雨春來多

封川

十咏傳嘉祐

宋嘉祐中田開知封州有

臨封十咏盛誇風土之美 征途喜乍逢時

平山少盜俗儉戶勤農趁雨收新麥連邨急暮春江船多賈客一稔給鄰封

梧州

東粵行初盡三江此要衝商通藤縣米旆出象州松北望雲千疊南來瘴幾重小舟如箬籠雙膝劣能容

雨中飲梧州郡守范拙存署齋

清絕蒼梧郡山城並水涯使君非俗吏官閣似村家雨  
戰樓閣葉籬編豆蔻花春寒連日甚勸我酌流霞

與郡丞趙默菴話舊有感

憶昔赴黔幕買帆泝漢陽趙家好弟兄一見傾肺腸吾  
兄謂韜荒亦豪士齒序同雁行君時甫弱冠意氣爭頡頏  
往往副虛懷高譚陋詞章風塵一揮袂自爾成參商奄  
忽四十年舊遊半存亡兩萍浮大海乃在天一方東坡詩蒼  
梧獨在我髮既摧頽君顏俄老蒼大才屈佐郡何以展  
爾長蠻城二月中天氣如梅黃入門巾屨溼急雨鳴淋  
浪呼童啓書齋延我臥竹牀此情不殊曩此景安可常  
別易會苦難况迫桑榆光臨分留數語俛仰多感傷

逆風上灘歌

船頭喜銳不喜方竹篙用短不用長上灘取逆不取順  
出險在閒不在忙老夫昏昏蓬底坐靜聽兩旁風雨過  
深慚作力後多人成就垂綏一游惰

雨中過昭平縣與馬羊叟

風磴層層上衙齋踞地高到門雲氣合入座雨聲豪已  
覺簿書簡猶多迎送勞酒香奴飯白青眼愧吾曹

龍門峽

龍尾千層雲龍頭万斛濤峽形當絕險崖勢故爭高木  
馬名船騰槽立藤蛇絡石牢雲端牽百丈絲路辨秋毫  
佟中丞貽我羅浮蜨繭數十枚三日前雙蜨先

出置之籠中朝來風日晴暖栩栩欲飛因開籠  
放之

五色仙山繭分貽不計枚似貪歸路近雙翅獨先開此  
豈籠中物無端入夢來人間何足戀好去莫徘徊相傳此蝶雖在千百里外必返故山

楊誠齋詩有韶州山又勝雄州之句余過英德  
為進一解曰英州山又勝韶州今日行至平樂  
城南羣峯競秀爭奇目不暇給英山又不足言  
矣問之土人無能舉其名者然不可無詩紀之  
也

突兀離奇縱復橫峯稠嶂疊總無名千尋自拔雲霄上

万古何曾艸木生佛指佛螺青未了石蓮石筍畫難成  
天教增損詩人眼直覺昭州又勝英

晚泊劉公渡望對岸諸峯

澄江一道鏡初鎔寫出東南隔岬峯指掌圖中看倒影  
夕陽一百二芙蓉

陽朔縣

雲從巫衡來勢落桂嶺外散為椎結族陽朔乃都會森  
森競駢植巉巉或孤介滿眼盡兒孫丈人竟安在孤城  
如廢井百雉陷其內亦復設官司于茲領岩若兩衙排  
鐵立日與刀劍對匪曰牧人民而云禦魑魅昔賢遷謫  
到所以多感噫俾山蒙惡名夫豈山之罪不作一錢直

斯言母已太 聖朝懷遠人吏職視殿最此邦瘴癘區  
遷轉異流輩于今號捷徑上考率三載寄語親民官後  
來須自愛

春燒

粵俗不好生連山發春燒新萸與枯桤往往同一燎昆  
蟲方啓蟄被虐慘無告造化豈不仁吁嗟落蠻徼客行  
天南陬半月抵都嶠侵肌苦毒霧白日罕朗照五行或  
偏勝風痺恐難療焉可無離易疏以離上三爻來為万  
物燥人情懷所便即事具慶弔此樂非彼欣相哀莫相  
誚

桂江舟行口號十首

龍江驛前水倒流竹棚移上別山頭趁虛人去愁喚渡  
失却閣沙剗木舟

灘江江色綠於油百折千回到海休多事天公三日雨  
一條羅帶變黃流

水自東流客自西經過大抵是淒迷木棉枝上鈎鞞鳥  
夜夜夜深不住啼

下灘不信上灘勞比似登山步步高好語梢公牢把柁  
上前只費兩三篙

行近昭潭灘倍多編郎勸力唱牙何此聲莫作尋常聽  
便是湘南款乃歌

南望蒼梧北桂林中間七驛瘴尤深不知雲氣藏多少

能使蠻天日日陰

霧雨濛濛霽景稀人編蕉葉作蓑衣櫓搖漁父唱歌去

牛背牧兒浮水歸

戍旗相傍有人家水退依然就淺沙二月芳菲看已盡

滿灘蘆葦自開花

過盡頑礪亂石堆繡山一穴忽天開明知不是秦人洞

容得漁舟日往來

一月春寒甚臘寒北風颯颯上檣竿南人不辦冬衣服  
也道朝來袂勝單

飲同年叢汝霖桂林學署兼志別

不以他途雜時猶騰此官名傳人口易實獲士心難行

色春將晚離筵花正殘蠻城一杯酒懷抱若為寬

上巳前一日發桂林

連日輕寒連夜風滿城桃李一時空伏波門外梨花雨  
春在鶯啼後嘯中

靈川縣齋清明

已過上巳即清明一月天纔兩日晴記取靈川好風味  
新茶新豆到山城

平蠻歌為靈川令樓敬思作

槃瓠遺種成野豻究拓百粵西南間桂林所屬半徭獞  
徭性稍馴獞性頑獞中廖二乃最狡結砦背子

義寧縣山名

藏神姦義寧邑宰畏如虎長惡不復加防閑康熙五十

有六載遂逞螫毒為民患叶平公然越境大劫殺乘勢搖

動西江灣東西二江在興安靈川兩縣界中靈川樓侯奮驍怒一念軫

卹周痾瘵請于中丞願勦賊朝發夕下無留艱官軍壓

境屹不動旁睨翻咲書生孱豈知仁者必有勇勇氣遠

過齊成觀出孟子註疏力捐百鎰鑄戎器更募丁壯踰千鏊

仲冬誓師謁神廟聲並淚下垂潛潛與神幽明共守土

捍禦災患宜相關狼貪豕突忍坐視一任滿耳啼孤鯨

陣圖兵法貯腹笥臨事布置神安閒先營壁隄後糗糒

下極坑谷高躋攀天寒雪少但瘴霧地盡石出皆榛菅

孤軍架阻三百里間道別取千尋山賊巢漸近徑弥惡

出賊不料攻而環焚林燎穴何處遁照耀岩壑朱旗殷

渠魁就殲脅從赦散以馘畝間閭自徙出疆迨飲至

三十五日師旋般明朝獻馘上幕府隊伍整肅排班班

受成例應給大賚為國惜費情非慳有酒盈缸其色碧

有羊在牽其首盼侯不居功以歸衆卑膠挾纊胥均頌

人傳封事上北闕我適問道將西還過侯治下暫弭

檄為我掃榻開門欂杯闌抵凡聽陳說竊嘆膽氣何其

豨如聞鼓鼙作餘力如覩介冑當躬擐朝廷設官鎮

羣獠文武分職毋相奸至令儒臣建偉績壯士母乃多

頽顏是庸作歌勒諸石義在小雅誰能刪他年采入桂

海志碑額不愧書平蠻

樓敬思朱襲遠追送于大融江賦三言古詩為

別

胡桐花万堆雪躑躅花千層  
大波淪小波沕百斛舟  
十夫力居者主行者客  
湘江南灘水北雲淄淄  
風浙浙難莫難此時別

靈渠行

驚瀧下走三百灘上流何至  
一掬慳灘源濫觴乃在此  
七十二重灣復灣此渠鑿自秦  
史祿初僅能通不能蓄  
迨唐觀察李濬之添設陡門  
三十六石槽石斛升斗儲  
一門典守用兩夫鐮隄前啓  
後下板修綆汲船如轆轤  
雷轟電掣飛一綫盈縮直從  
呼喻變官船銜尾客船停  
那得人人與方便勸君小泊  
底須愁不過多為半日留

平生恥共人爭路况有林巒慰勝游

陡中岩岫絕佳

夜泊鐮背伏波祠下湘灘二水分流處

伏波祠廟枕江濱湘北灘南兩派分  
新月滿船天在水蒼梧回首万重雲

興安田家

遊勒連邨綠樹濃家家臨水設機  
春刀畊火種風初變問是山農是  
澤農

夕抵全州城外

晨發鐮背潭暮抵洮陽境急流二  
百里一宿兩程併去適塞世多途  
疾遲吾有命適來非意計及此聊  
乘興我我湘春樓鬱鬱蒼松逕

城南松徑亘百餘里相傳陳堯叟所植

咫尺不可

尋黃昏風雨橫

零陵道中

旗脚東北擲朝來乘便風清湘送帆影翩若南歸鴻臥  
看兩岸山白雲起蓬蓬前飛不作雨掠過青玲瓏導我  
向零陵為我驅霾霜在遠睇歛接緣沿路靡窮昔讀子  
厚記神遊乎其中溪山豈不佳好事疇繼公便欲訪古  
蹟征途去匆匆無人為指似艸本徒籠葱

題浯溪寺中興頌磨崖碑後

在祁陽縣東南五里

靈武功成賴朔方中興名號遂歸唐少陵善頌無多語  
勲業汾陽異姓王

千古磨崖一統碑後來山谷有題辭獨教宦蹟留餘憾

不刻春陵數首詩

三月十五夜湘中見月

于後忽半年孤懷寄歸艤北來甲十宿今乃辭瘴鄉地  
當衡永交水派瀟合湘明波蕩圓魄春月如秋光乾坤  
清氣中草木流真香粲粲風乍發滂滂夜何長遙聞漁  
父歌鼓柁下滄浪白鷗飛不到江永烟蒼茫

過郴江口有感于杜工部事

十載遊巴峽三年客楚疆青袍常避亂白髮儼投荒許  
國才難盡憂時命不長靴洲疑冢在過者亦神傷

望衡嶽

昔遊曾到長沙郡三十七年今又來夜向湘江聽雨過

曉從衡嶽見雲開帆移九面鏡中轉雁斷一行天際迴  
欲著青鞵還自嘆已無脚力上靈臺

徐靈期南岳記衡山者朱陵之靈臺

淶口沽酒

沙灣小市柳毵毵  
淶水鱖成味最甘  
滿引一杯歌一曲  
無邊春色洞庭南

醴陵縣

長沙封壤盡僻路極崎嶇一水趨湘急孤城入楚深  
怪禽嗥少伴斑竹泣成林苦語騷人得幾同木客吟

前過常山玉山今過醴陵萍鄉四縣令同以一事去官偶紀之

朝廷惜民力大事給郵符朱郎徵求急皇華道里紆上

官曾有檄小吏似無辜獲罪由晉笏冤哉何易于

自湘東驛遵陸至蘆溪

黃花古渡接蘆溪行過萍鄉路漸低吠犬鳴雞村遠近  
乳鷺新鴨岸東西絲縑細雨沾衣潤刀剪良苗出水齊  
猶與湖南風土近春深無處不耕犁

復入舟

天公假我一日晴籃輿軋軋山中行山行既盡復買棹  
欹枕夜聞雷雨聲諸灘暴漲波雪雪人與鷗鳥互相雜  
秀江橋外櫓枝柔穩過袁州小三峽

牛欄鍾山昌山三峽在宜春分宜兩

縣界中

盧肇宅在宜春城外今為學宮石筍一株猶存

相傳唐時故物也

舊聞盧氏宅中有讀書臺地以名流著人探古蹟來便  
應呼石丈幸不中碑材顏魯公事見歐陽四門集秀色如堪挹摩挲

一片苔

分宜感事

曾從史館見長編太息明朝嘉靖年牛李恩仇初植黨  
京攸父子互爭權東門牽犬情相似西市駢臬世不憐

賸檢鈴山籍官簿兩橋猶盜水衡錢嚴氏父子敗後有司籍其家事見鈴

山籍官簿中當時于州縣城外造兩石橋費各鉅万世蕃皆盜官錢為之鄉人不知至今猶有稱道其事者

清江道中

甘林百里夾清江岬岬風來白雪香何減浣花溪上路

人家多在果園坊

重泊鉛山河口却寄施澍如

弱纜牽船與岸平一支春漲轉山鳴坐看片月流雲影  
臥聽長風挾雨聲此地故人曾有約重來小吏最相輕

講堂不到吾滋愧為報新編志已成去春曾枉書幣邀余修鵞湖書院志

今屬稟粗就施已內擢離任矣

朱錫德璵出家為僧法名某號渭宗今住沙溪

靜室舟經其處留詩一首

汝甥吾是甥夙世世間緣見面尚相識出家今幾年但  
能修苦行不在學參禪蚤晚黃梅雨隨農且種田

自題粵遊草後

老夫不怕寒怕熱冬月出門夏到家輕負嶺南三百顆  
此行剛看荔枝花

一日倒吟詩一章中間未覺應酬忙無端來往萬餘里  
題徧前賢謫宦鄉

敬業堂詩集卷四十八

